

甯武府志

(24890)

寧武府志卷之二

山川

寧武縣



華蓋山郡北倚郭山也俯瞰城陰一峯特秀形若華蓋  
蓋明時築護城墩樓於上劉養志有碑記之墩  
永寧築於萬曆甲午歲

管涔山一曰燕京山在縣西南六十里其高七里周  
蟠五里下有龍池為汾河源餘岑別嶂遠近逶迤  
綿繹相屬雖名稱異出實本一山也山海經云管

山西省圖書館  
地方文獻

01350

寧武府志

山川

涿之山無草木而多玉今絕不聞

管涿燕京魏志分以爲二蓋仍舊史之誤而未  
覈焉者山海經云管涿之山汾水出焉淮南子  
汾出燕京酈善長注汾水引關駟十三州志云  
汾出燕京亦管涿之異名也是其一山明甚特  
古人所稱偶有不同或在昔時本有二名耳如  
魏志所列燕京在縣西南二十里管涿在西南  
六十里而汾源則在管涿其勢邈不相接淮南  
關氏豈漫爲說而曰汾出燕京與其異名者乎  
意魏志所謂燕京者其山初未必有此名大抵  
後之志地理者強相傳會而加之及傳之久遂  
以爲然而莫能辨其非也

蘆芽山在縣西南九十里寧化所連東西馬頭二山  
及高喬諸山層巒疊嶂峻削壁立縑薄蜿蜒以亘  
貫於五寨岢嵐靜樂間

火山在縣西四十里分水嶺北童然無草木冬時山  
上亦烟氛蒸鬱熱氣薰灼人不敢近

樓子山管涿諸峯之一也西山間有神祠祠下汾水



源所出有古碑刻云汾源靈沼歲月不可考樓子  
山下爲支鍋石山有支鍋小水入汾

分水嶺在縣西南四十里嶺東爲恢河源嶺西數里  
爲汾河源

魏志云意此爲宋遼分界處

石門山在縣西五十里

棋盤山在縣西南六十里上有石枰多青紅杆樹

清真山在縣西六十里西距蘆芽嶺三十里而形勢  
相接其高八里山巔有泉下垂號曰水簾中有清

真菴最爲勝地

虎頭山在縣西七十五里高三里周五里巔岩峻險  
人不能陟六月常有積雪

魏志云通考寧化有雪山建四砦當卽此山也

林溪山在蘆芽山後五寨縣界山下有泉名龍眼爲  
汾河別源

樓煩嶺俗訛六番嶺在郡城南七里崞縣志名六盤  
嶺

六盤嶺車馬徒行至此皆盤行六折而後上崞

志之名得實矣六番義猶六盤恐未果爲俗訛  
而其舊之本號樓煩也

鳳凰山在郡城南七里接六盤嶺與崞縣界鳳凰山  
左右諸峯屬絡有紫峯山有橫山有蓮花山段家  
山刁胡山麻楓嶺牛家嶺宋村嶺壩塢嶺皆城南  
山也城南十五里有駱駝山高五里

鶴兒嶺石湖嶺皆在縣南明嘉靖二十年副總兵丁  
璋與虜戰死石湖嶺下

染峪山在縣東十五里染峪水出其下小水也

禪房山在縣東北二十五里連雁門山高二十餘里  
周盤二十里山中有洞石佛龕其中不知何時鑿  
者

虎城洞在縣北三里

黃華嶺在縣北十三里大嶺也寧武神池南北限焉  
上有墩臺敵樓

仙人洞在縣西三十里高七里周十五里有大石門  
小石門環山皆產香菌

回春谷在縣西百里谷中周廣數里巨石盤旋峭壁

千仞其內氣和如春近正月時蟄蟲皆振衆草已  
綠蓋地處隱奧霜冽風肅氣不得侵故也

神林山寧化西南三十里高二千丈周二十餘里北  
接蘆芽西連荷葉坪東通州湖口林木阻深

鷹嘴山在蘆芽之陽石嘴下垂山色黝黑

虎北山在寧化城西北四十里峭壁連天澗幽林茂  
有紫峯滴水諸岩天生洞穴可避兵革

突峯山在寧化南八里挺秀雲表下有龍池山巔古  
寺遺址殘碑尚有存者

觀棋山寧化東一里上有烽臺龍池在其下或云元  
時有將軍者旱而祈焉龍應禱矣

西崖山其峯峻絕勢似欲墜明時置戍守之

汾水出縣西六十里管澤山之樓子山聖母廟下與

林溪山龍眼泉合流於支鍋石前其旁石罅多水  
脉西南流自三馬營經二馬頭馬兩營至寧化北

屯合天池水流寔巨又經壩門口合蘆芽山水又  
經南屯村川湖屯溝口村十家莊南流經定河村

又南至潘家灣行地一百五里南流入於靜樂漢



地理志云汾陽縣北山汾水所出西南至汾陰入河過郡二行千三百四十里

魏志云水經注稱汾水又南與東西溫溪合今靜樂志有溫泉二一見石味山一孃孃山所稱溫溪者或卽此歟寧武二馬三馬營田六七十里藉汾水之潤縣中田在山坂少渠道唯此土富饒

恢河源出縣西南四十里分水嶺東北流經郡城南門外又東流出陽方口入朔州境一名渾河

魏志云按水經則寧武天池乃桑乾河源之最遠者

天池在縣西南四十里天池山元池在天池東七里山巔俗謂之雌雄海子崗麓相間而津脉潛通池自西南流由寧化北中山寺出峽注於汾水唐時置天池元池牧監各一設使領牧馬卽其地也水經注云桑乾泉卽潦涓水者也耆老云其水潛承太原汾陽縣北燕京山之大池池在山原之上世謂之天池方里餘澄渟不流皎焉冲照池中無斥

草及其風籟有淪輒有小鳥投淵啣出陽焯不耗  
陰霖不溢無能測其淵深嘗有乘車池側忽遇大  
風飄入於水有人獲其輪於桑乾泉故知二水潛  
流通注矣池東隔阜又有一石池方可五六十步  
清深鏡潔不異大池

魏志云天池方廣可十餘里元池方圓可五六  
里水經注稱石池方可五六十步殆未之見也  
太原志云天池卽祁連泊池在靜樂縣北一百  
四十里古稱祁連池在秀容界乃靜樂卽古北  
秀容地志言是也

黃華澗水出黃華嶺一由城東關東南流一由城西  
關南流皆入於恢河

鳳凰山水自鳳凰山北流至縣東南入於恢河

蘆芽水出山中東流至壩門口入汾

王瀾灘河出靜樂山中西流至縣之溝口村入汾

秋泉卽通志古泉也在縣治東北萬壽山有石甃之  
一泓澄澈春夏漸涸民人抱瓮而汲者以先後爲  
次不得越取立秋日始盛七月後水與階平取之



不竭

東洋河出分水嶺流合天池水

西洋河出岑峯山定河出神林山壩河出荷葉坪下  
三水與東洋水俱入汾

南泉南城外二泉並湧味冽

釀泉漢出南城里許土阜上可釀酒人呼釀泉

偏關縣

九龍山在縣城外九峯相環術者以爲茲山地脉之  
善故城臨絕塞屢被重敵而訖無兵焚之禍

韓光嶺在縣東北一里北漢建砦處也或云遼時常  
置武寧縣於此

雙鳳山在縣東七里兩山對峙中界關河下有泉二  
名鳳眼

魏志云卽三關志三鳳山也

虎頭山劉家山張家山並在縣東四十里草廠山在  
縣東六十里

吳泉嶺在縣東七十里高百餘仞西與草廠接雖當  
炎暑涼風凜然下有泉

馬鞍山在縣東七十里明嘉靖四十三年俺答由此  
山入犯老營堡

鵬窩山在縣東七十五里

西山在縣東七十五里石壁嶄絕人不能陟

馬家山在縣東八十里有朝陽洞洞中有陰陽二穴  
陰穴燭以炬可窺其底陽穴深不可極近穴如聞  
風雨聲

鎮溝樓在縣東八十里亦險隘地也又東五里有鴉  
兒砦

雙碑塢在老營堡地馬鞍山之役游擊梁平寺備祀  
謨禦之墮虜伏中七百餘人皆歿巡撫萬恭勅雙  
碑記七百人名於此故塢以之稱

馬頭山在老營堡西北高三十里亭亭直上  
地椒峯在老營南產地椒

土塞山在縣東九十五里孤峯獨秀迥出羣山  
大蟲嶺在縣東百里奇峯峭立岩壑幽邃昔多茂林  
今則童矣

南堡山在縣東百里土山載石所謂确也周數十里

上有五色石

好漢山在老營堡東

霸子山在關東三十里

柏楊嶺在縣東百里昔多柏楊故名縣東百里又有

鄧家山山如南堡

南北長嶺在縣東百三十里周四十里

鐵駝塢沙在縣東十五里沙中藏鐵如臥虎之形

舖座山在縣東南二十五里

蒿溝廟山在縣東南四十里上有古廟碑蝕不可辨

爲何時廟也

龍霸山在縣南四十里高七里盤踞十五里

昭君塢在縣西北二十里昔傳明妃常至於此矣

紫荊山在縣西北二十里

北峯岩在縣西北五十里高數百仞下臨黃河有石

洞數十處又一里絕壁懸崖中有鐵索懸一棺故

老相傳爲金北峯之樞人不能近未知北峯何人

矣

北石梯嶺在縣北十里連滑石瀾老牛灣二堡



十八盤在縣北四十里高百餘丈

明燈山在縣北五十里高百餘丈崖峽中啣大鐵蓋

或言昔現佛燈光照山谷

東長石嘴在縣北五十里與西石嘴對峙峽東長五

六里河流經其中東石岸西石岸乃中外分界地

也

常勝山在縣北六十里右連老牛灣左接滑石澗

蠶虎口在滑石澗稱邊隘地

白龍殿山在縣東北五里下有石洞崖上水時時滴

洞中禱雨則應

草梁山瞭高山駱駝山皆在縣東北七十里或傳明

曹國公李文忠北征時常駐兵駝山下山有洞頗

深土人秉炬入里許蝶大如箕翔舞來撲炬幾滅

乃返自是無更入者

視遠洞在縣東北一百十里乃五眼井邊隘也戍樓

遠眺下有石洞

了角山在縣東北偏頭之山爲北派接大同之了角

而西爲草梁明燈紫荆以至老牛灣而西盡於河

王家屏修守三邊記偏關起蕨菜峯而訖於了角溪洞在縣南三十五里迤西村洞中怪石錯峙入二里聞水聲不復能前矣。

官河卽關河也自朔州流入縣境其源有三遠者出朔州狐狸溝鳴子坪近者出老營堡東鴉兒崖下最近者出縣中馬站堡西沙窰寺萬泉滙流經偏關城南繞而西北至關河隘口入黃河後多淤塞惟沙窰諸泉湧流由泉距城二十五里繞城又渡二十五里焉

黃河在偏關縣西北七十里通志云河自塞外西南流至寧武府偏關縣老牛灣入關河口其南則河套也胡渭云黃河自廢勝州東入塞其東岸則平魯衛又南逕府谷縣東其東岸則河曲縣保德州府谷在陝西葭州東少北三百四十里河流逕黃甫川東九里入縣界又南逕縣東去縣百步河曲在山西太原府西北五百二十八里黃河在縣西北太原府志云自縣東北故東勝州境轉而西南流八十里至縣西北平泉村復轉西流九十里至

天橋峽又南流入保德州界偏頭關在縣東北一百十里東接鴉嘴山西逼黃河

魏志云自老牛灣口界緣邊曲溯西關口距縣城二十里下達樺林營

海子溝在縣東二十里泉勢瀆溢

迤溪溝在縣西南三十五里有溪洞滴水成乳

滑石澗在縣北六十里有堡

大泉溝在縣北七十里地有湧泉每雨泉溢會紅水

溝流入關河

後海子在水泉堡西南入紅門口者取汲焉口外附

塞垣又有南海子在官道傍

白龍洞泉在洞口崖側泉傍雖夏日不知暑也

黑水泉色黑味冽在城西南百步許

神池縣

黃華嶺一名摩天嶺高齊之世所稱達速嶺也中峯

高四十丈周蟠七十餘里上蓋有長城舊跡云其

東南綿界寧武西北躡乎神池者過三十里踰

石炭窰山在縣西南十五里產石炭



旗山在縣西南三十里蟠旋二十里峯高三十五丈  
東接黃華嶺西連五寨諸山參差斜曲狀有似於  
繆旂矣一曰霸王嶺則里俗之稱也

洪佛山在縣西南六十里爲蘆芽支峯山有石廟廣  
二丈或云旱時往祈有神蛾賜水於瓶內火燎炙  
取之下山輒雨大抵巫者爲之

東雪山東去八角堡十里高二十里深夏雪不消  
五連山在縣西十里高九十六丈蟠十里自縣迤西  
岑阜屢多騰伏者

鳳凰山在縣西二十里高三百餘丈山中有紅黃小  
鳥每雪霽則飛翔爭鳴

轆轤窰山在縣西七十里中有洞洞口懸轆轤登山  
者挽而上洞方廣一畝或云可容萬人其能爲靈  
異如五臺清涼石矣

神池在城西門外環城西南冬夏不涸一名西海子  
明劉養志神池堡文昌祠記踰黃華嶺而下自巔  
抵麓地少平有水一泓出無源去無跡雨旱不盈  
涸名曰神池有古城遺址

魏志云神池在縣城之西其西南北三面山水及城東大澗口水之西流者皆注之汪爲大池年久淤塞居民多佔耕者而古蹟遂湮乾隆三年縣令李識蒙到官始按舊界稍理淤壤歸之池然已不能盡復其故識蒙自有記刻石縣中紫龍池在神池城北二里東山上山有龍祠溫泉出縣東五里溫嶺下

東泉在縣東二里南泉縣南一里與溫泉皆注於神池南泉者或云昔有胡僧趺坐其處以手爪地面

### 泉湧

與龍河故義井河也源出義井屯東北山趾南流復西至五寨縣三岔堡與瀾連水合康熙中六師征噶爾丹駐此方乏水而河流驟溢明日軍行水亦復故乃有是名矣

青羊渠水在縣東北三十里諸山谷水皆匯此

達沐河出縣北利民堡南辛窰村山麓平地湧泉其水澄澈冬月猶溫岸草不枯曲折西南流入五寨縣至三岔堡凡九十里與五寨南山水合

魏志云今利民堡元之達沐河戍也故城遺址  
在今堡西南五里

魏志義井達沐兩河皆至五寨三岔堡與五寨  
水會然於義井則云會瀾連水於達沐則云會  
南山之殊頽水說已不同及觀所志五寨之瀾  
連水則又云達沐河自東曲折九十里來注而  
無復會殊頽之文是更自抵矣至覽篇首所列  
五寨縣圖其中水道唯注殊頽於傍若瀾連水  
絕無有何耶抑其記瀾連水所經縣地東西  
折尤多不分明且并不言義井達沐會瀾連水  
自縣中西流經岢嵐河曲保德以入黃河而第  
云西入黃河則似黃河且歸五寨矣

五寨縣

蘆芽山在縣南六十里高二十餘里其所蟠周則西  
接岢嵐東帶寧武南連靜樂而雄踞五寨峯巒特  
秀前有羣山森列名小蘆芽上有金龍池五龍洞  
秀峯嶺紫峯崖鳳凰嶺東西火場大小天澗束身  
峽捨身崖九光梯華嚴寺說法臺金佛堂太子殿



諸勝釋氏以爲古毘盧佛道場也太子殿尤居絕頂久旱可禱明中世時山中佛寺頗衆紺字精藍緣崖依澗多唐宋所遺而林木恒茂崇初爲劇盜所據於是刹舍灰飛緇徒畧盡曩之勝觀無復一有今訪舊跡唯太子殿存焉

魏志謂蘆芽一名大峪山一名太古牢山蓋其謬假水經遼史而爲強說者勿論今五寨非漢之中陵縣地固不得以酈注中陵川水而託蘆芽爲大峪卽以遼史言之咸雍八年

**太古牢山**因問耶律頗的邊事對曰白應州南至天池皆我耕牧之地今宋人烽堠內移似非所宜道宗然之乃令頗的使宋求天池廟地而使蕭迂魯屯太古牢山以備之夫太古牢山乃契丹國語在中國不知當作何等名然史明言道宗獵於此則太古牢山當屬遼西京近地且宋史稱遼求天池廟地河東帥龐籍訪於都監郭逵逵以太平興國中故牘証爲宋土遼人愧服天池且爲宋土而五寨當宋時實界

嵐火山兩軍州而處其中而蘆芽又在今五寨南六十里去岢嵐尤近遼主安能入獵於此而又安能使其將屯兵於此乎是不得強指蘆芽爲太古牢也明甚必欲謬而稱之豈實錄也哉看花臺在蘆芽山城東南四十里上多異卉南峯臺城東南五里羣山拱擁內有古刹

北岳臺卽北峯臺也在縣北六里石邱突起上有北岳廟春時縣人多往祈者或云頗著靈異

石欲在蘆芽山上構危樓

萬佛洞在蘆芽山明釋福登居此神宗賜號真來佛子造萬佛鐵塔萬佛石洞於其間

東雪山在縣東南二十五里高八里上下雙泉湧出有馬家寺古塔

南山在縣南五里上有長城遺跡

西雪山在縣西南二十五里山勢崇峻暑月清涼

荷葉坪在蘆芽山南高千餘丈終歲積冰雪四面崇峻其頂平夷形類荷葉大可容萬馬或傳宋將楊

業曾於此操兵有將臺遺跡

按於此聚兵當是元末四大王耳而誤爲

業  
矣

魏志荷葉坪五寨與寧化兩書之然自當歸五寨魏旣以蘆芽管涔爲一山而荷葉坪乃其南峯然記蘆芽則云盤踞六十里於荷葉坪則云八十里至寧武所載荷葉坪復云廣百餘里一山而自爲不同若此

風洞峯在縣南五里高與天際巖間有穴而小奇石橫生土人以爲風洞云其傍有舊墻約十餘丈不知何時築今磨滅殆盡

馬蹄山在縣東北三十五里石上有馬蹄跡傳爲尉遲敬德之遺

清澗河源出縣東南六十里蘆芽山下自蘆芽北流二十里至縣之店坪村經南山下又北流三十五里至薛家口流分爲二其一東北流至縣之小武州而止其一北流五里經縣城南折而東一里至東關外自東而北順流六十里至三岔堡折而西流六十里入河曲縣與河曲沙泉水合流八十里經保德州北花園子入於黃河凡行三百一十三



里清漣水始發南山山高地險水性湍急至薛家  
口則地漸平分支而流勢亦少殺雖淺狹而清澄  
不濁足人資之引溉園圃

瀾連池或云彌勒水深丈餘廣盈數丈澄空及底流  
光若金故又謂之金蓮池源出荷葉坪東馬頭山  
東流至蘆芽山下淨水池與清漣水合

神武川源出縣東南神武鎮口流歸清漣水

凡叙山川必以經緯五寨之水清漣其經而瀾  
連神武其緯也經水能自達乎大川若瀆之能  
自至於海緯水不能自達必因經水而通乾隆  
十四年因檢列縣諸水得五寨縣令所送水道  
觀其形勢知瀾連神武皆小水而清漣則其大  
者故所叙與魏志特殊

甘露泉在縣東南十五里馬家寺或傳尉遲敬德行  
兵至此軍渴馬跑出泉因名馬跑泉今泉上有龍  
祠

確雲洞在蘆芽山側石室天成

大天澗小天澗俱在蘆芽山中兩山中斷萬仞無涯

或謂五寨有殊頹水又謂殊頹與太羅水南流  
至汾州且六百里又志景物謂殊頹水源於縣  
之店坪山然檢五寨實無殊頹水者或者之意  
蓋以拓跋氏置殊頹縣卽今五寨地是因水經  
注有樹頹水遂欲假其名以強實之其說曰元  
魏置殊頹縣隸神武郡今五寨南山有殊頹水  
又云五寨清漣瀾連神武川諸水尋源竟委非  
樹頹則太羅必不能外此二者是徒見水經而  
仍未知水經也水經云河南逕定襄桐過縣又  
南樹頹水注之又南太羅水注之酈元注云樹  
頹水出東山西南流至沃陽故城西而南注於  
河太羅上承樹頹水南流西轉逕武縣故城南  
又西南注於河夫黃河初不經五寨而樹頹太  
羅自塞外已注入焉安得五寨有此二水哉且  
二水已注於河又何從南流以入汾而云至汾  
且六百里乎又謂蘆芽一名太古牢山太牢太  
羅其聲相近亦猶今呼討討城爲脫脫城卽樹  
頹水或屬塞外而太羅水亦必出於蘆芽山矣

則又不能自持其說而徒愈滋紛惑者  
夫志山川則猶詮叙人物云爾奇瑋是登餘非  
盡錄也若乃雲雨所興以之爲望藪澤鍾美必  
有所資及其舊跡靈名麗觀勝矚於焉是記片  
壤增華至如岑阜非奇行潦流惡斯鋪陳而何  
取亦綴屬之徒煩故此所書已備其概餘諸瑣  
細無足堪述者不復次注圖經矣

津梁附

西關永濟橋明時舊建

南關木橋在恢河上每十月則構以渡行者夏  
月水發橋將漂毀則撤之

陽方堡安遠橋明都御史高文薦建於九龍口  
自堡城西南直接東山築埵壘石橋長八十  
餘丈下爲水門五上建高樓陽方爲寧武咽  
喉此橋旣建敵騎不能長驅後毀於水兩堤  
僅存文薦自有記刻石

上寧武

廣濟橋關南迤東五里明嘉靖中守備薛昂建



其後修橋者四而復圯焉雍正十年民呂玫募資重修

通濟橋在廣濟橋東百步許亦嘉靖中建今廢久矣

城西鞏西橋去西城一里嘉靖二年守備崔堂建已久廢

城西北永濟橋去城西北隅一里明天啟三年兵備楊若子叅將盧晰同建後凡再修雍正元年毀於水

控北橋明崇禎六年兵備盧友竹建後因修關城乃毀橋而取其石

城東通真橋在東門外明嘉靖十八年總兵祝雄建

老營堡寧邊橋在營西門外偏關老營往來之路也

上偏關

趙官莊橋在縣西七十五里雍正三年民高溥等建

喬官莊橋在縣西八十里康熙五十三年民張  
鉉等建皆塘郵大道

上神池

西關石橋

東關石橋南山水流其下

郭家河橋在城西北三里爲往來通途

右所石橋在城東五里

神武鎮口大橋城東南二十五里

郭家河橋縣北二十五里河保水泉二營通路

官莊大石橋城北六十里東接神池爲京師陝

西往來塘路

店坪山木橋在縣南四十里深溝峭壁賴以涉

險

三岔西關大石橋通京陝之路

長城梁在縣南五里

上五寨

寧武府志卷之三

城池

明既定天下廣斥邊境雁門以北皆爲屯戍兵民耕牧河套中是時寧武之地外有藩屏故雖處塞壖而城守保築之事蓋少其最始見者唯寧化偏頭二所而已自洪武二十六年捨唐受降城之舊而衛東勝已失二面之險至永樂初又撤東勝以就延綏于是外險盡失與敵近接天順六年蒙古部入居套內其後邊患頻亟偏頭寧武之間時時突



擾以及于岢嵐五寨當事者乃益議置兵設險以自固由成化至萬 版鑄日興城堡相望所以計阨塞禦戎馬備攻圍謀保聚者衆矣今邊廷晏然既爲四縣多因其池隍之故而少所增廓然春秋之法尤重城築固不可以不備書而凡明老建堡築屯以重邊防者於郡又有所繫故并列大要其不築于官與非乘障所急亦畧勿具存

寧武府城

縣倚郭

築于成化二年初爲關城巡撫都御史李佩請卽古寧化軍口置關設都指揮領軍守備乃以是年丁亥三月始事明年四月城訖以總兵鎮之遂爲鎮城城北踞華蓋山因其高而俯其東南西三面周四里許基五丈面廣半之高三丈有奇門其東西南三面而閉其北東門曰仁勝西曰人和南曰迎薰上建重樓 治十一年巡撫魏紳拓廣之周七里一百二十步增埤五尺加闢北門亦建飛樓于上名之曰鎮朔城狹于南北長于東西其形科櫛望之若敷巾幅然然皆土築萬 元年巡撫趙

某議包以石益加增高連女墻四丈二尺然未果  
行至三十四年寧武道郭光復始甃以磚又築東  
西關城皆磚甃共長一千七十餘丈高三丈五尺  
西關門曰永寧其南出者曰阜財東關門曰久安  
其南出者曰解慍下有塹先是萬曆二年寧武守  
備某築護城墩于城北山上方廣二十八丈高二  
丈爲基其上爲臺臺上爲樓三重樓外列堞二十  
四登之可眺百里臺下周以磚墻直一丈環廣四  
十丈墻上列堞四十屹然與城表裡巡撫魏允貞  
所使也今樓梁已廢國朝置府城因其舊寧武  
營在焉乾隆六年東關門樓圯知府魏元樞重葺  
之顏曰望華並修南北二角樓城南接鳳凰山寧  
武人又呼爲鳳城

通志云城築于景泰元年又云成化二年建景  
泰至成化改元相去幾二十載何自牴若此三  
關中路圖云寧武關城正統己巳築夫方正統  
時關尚未置何有築城卽因事土築亦當他有  
所名必無預爲寧武之稱者且李侃請卽古寧

武軍口置關亦絕無少及景泰時事是寧武城于成化初始築無疑矣又寧武先時本屬崞縣崞志載設關築城訖工于成化二年亦初無景泰之說殆爲實錄可以指証中路圖通志之誤至趙巡撫于萬元年議包磚石郭光復于三十四年發磚通志兩載之魏志遂謂或趙于元年已包發某某方其餘尚有未發者故三十四年郭復發焉然今寧武城皆裹磚無石而高亦僅三丈有餘與趙巡撫云云殊不相比以理推之蓋趙在當時不過議欲如此實未嘗致功後之發磚爲固以至今日者則皆郭兵使所遺成績耳

寧武在羣山中地庫勢偏登高而視猶井底然蓋地牢天灶之類正兵家所甚忌者明人於此置關豈爲能擇地利哉雖三關志稱兵使張鳳狃以其難守復建寧文堡于西山與相犄角然城之形勢已失使敵陣山上將不攻而自下何從得收犄角之效耶



護城隄 明時建恢河自分水嶺合諸山泉流經城南每夏秋時騰奔洶觸迅如建瓴乃爲大石隄繞東南西三面以衛城郭明平陽水利同知司其事歲加修治往往費至八百金不惜故堤常完而城恃以固入國朝司水利者無復至金亦盡省久之隄盡崩毀水每大作衝嚙城下城趾漸墜乾隆九年寧武知縣錢之青以告知府魏元樞共捐資募民數千人循其舊跡爲土隄四百六十丈又築直隄三十六丈值城門之南樹柳於隄以爲固且令民得瀦水灌田十一年水尤盛隄潰十五六魏守錢令復捐錢百餘緡補築之且疏河流使得通利復教民歲以土培隄令保長久云

陽方口堡 明嘉靖十八年巡撫陳講築堡爲中

路第一衝口地勢平漫十萬騎可成列以進

盤道梁堡 宋之士陞砦也明嘉靖三十二年築

置倉有倉使防守之屬萬二十三年以邊高堡低難守改建于邊內

夾柳樹堡 在縣東南六十里明正德十一年建  
燕兒水堡 在縣東南四十里明正德九年建萬

十五年砌石

鵬窩梁堡 在縣東南六十里明正德十一年建

隆慶二年砌石

朔寧堡 南距寧武城三十里明嘉靖十四年建

小蓮花堡 在縣東南七十里明正德十一年建

寧文堡 在城西一里山上明正德十年張鳳翔

築萬中郭光復砌石

二馬營堡 在縣西南七十里設空心看軍樓一

寧化城 宋嘉祐六年以河西夏人往來隘口乃

立寧化軍因隋汾陽宮城之舊趾廓而築之金

元因焉明洪武二年設寧化巡檢司山西都指

揮常守道帥官軍來屯將舊城六里二百七十

步南邊關廂截去於城東山坡之上隨地形勢

築城二里一百九十七步未完調去五年延安

侯唐宗勝千戶唐成繼成其功城高三丈一尺

濠深一丈城樓六座十一年改巡檢爲寧化守

禦千戶所隸山西都司嘉靖中改隸寧武至萬  
十四年發土城以磚當改寧化所時設掌印  
千戶巡捕城操吏目各一中  
有靜樂倉今仍爲  
寧化巡檢司

按宋史寧化軍四砦曰西陽腦子細腰窟谷今  
並無跡明寧化四堡曰石壩榆會川湖大峪凡  
四處共領三十六屯又有十四寨其川湖定河  
石佛三岔南坪諸堡皆洪武中千戶唐成呂鳳  
修所築並已久廢

偏關縣城

明洪武二十三年鎮西衛指揮張賢築宣德四年  
都督李謙展修正統十四年都督杜忠復增城堞  
天順二年指揮袁勝再拓城東面成化六年巡撫  
李侃拓其西南 治元年兵使王璿又展廓東面  
自是城始寬廣周五里一十八步高連女牆三丈  
五尺東西南三面爲門上建重樓至嘉靖中總兵  
周尚文祝雄先後修築守備劉隆叅將杜承勛繼  
之而護城牆一道則叅將田世威所立者其後兵



使王遴磚甃城東南隅四百餘丈兵使王學謨于  
東西南增修益加高厚易睥睨以磚隆慶三年修  
于兵使范大儒若磚甃建樓城更一新則萬曆七  
年兵使蕭大亨所作也二十六年兵使趙彥增城  
南關廂沿河築石壩東而置重閣洞門南門置水  
門二其西亦如之由是規制愈壯 國朝因之不  
改卽爲今縣城偏關營在焉乾隆十三年知縣陸  
剛以東西北三面多圯詳請建修

洪武二十三年太原志作十三年未知孰是偏  
關志云北漢偏頭砦卽今關城又地勢東仰西  
伏元改名偏頭關置武節將軍樞密院判守之  
張賢改築于西原城近河坪去舊址里許

樓溝堡 在縣南四十里明隆慶二年兵使范大  
儒建堡凡新舊兩城三關西路圖云本堡地平  
水甘北虜每駐兵于此四散劫掠偏老以南樓  
煩以北欲通聲息必藉此堡爲策應

老牛灣堡 明崇禎九年兵使盧友竹建俯瞰黃  
河外接套地邊陲要區也堡旣立移兵駐之

老營所堡 在縣東北九十里明正統末都督杜忠建成之以兵成化十二年侍郎杜銘置廣積倉其中後巡撫韓邦奇兵使賈啓復展修明給事中劉東星疏云老營左控平魯右接偏頭陽方諸口恃爲耳目最稱要害今老營營在焉

賈家堡 縣東一百里明嘉靖末兵使王遴總兵孫吳建東接雲朔北通五眼井西接老營南通長林烽火爲朔州寧武咽喉

五眼井堡 縣東一百十七里與大同接界總督

翁萬達以爲外內兩邊之要扼

馬站堡 縣東四十里明正德中兵使張鳳拙建

嘉靖末兵使王遴修明時爲三關游擊所駐

水泉營堡 縣東北七十里明宣德九年都督李

謙建北去大邊紅門口僅二里最當虜衝隆慶

二年設守備堡城東少北爲紅門口附口外少

南有南海子城西南有後海子今水泉營在焉

紅門市口堡 亦明宣德九年李謙建設敵臺洞

橋一座外設邊牆一道壕塹品字窖三層以卒

卷之三  
二十八人守之司偵望後萬曆中中國與順義王諸部互市於此

草梁山堡 縣北六十里明治中兵使楊綸建堡突出崇山直望三十餘里爲沿邊傳烽之首三關西路圖云萬 中草梁山邊外雙墩子黑松林鴿子溝小井兒諸地皆酋首分部住牧其最近者距邊不過二十五里萬 末欵貢以前虜犯邊每由草梁山入

滑石澗堡 縣北七十里亦宣德九年李謙建堡近傍邊墻有滑石澗水隆慶三年兵使范大儒叅將方振重修

### 神池縣城

明正統十三年置神池口巡檢司有土城址成化十五年築堡初與利民三分八角稱四堡城嘉靖十八年巡撫陳講兵使王鎬以其形勢迫狹乃展築焉設守備中軍防守神池倉大使各一萬 四 年城始甃周五里七十二步高三丈五尺門三東曰迎曦南曰雄鎮西曰保障上皆有樓設守備一



今改爲縣卽以堡城爲縣郭神池營在焉而城未加廓也

利民堡 縣北六十里元達沐河戍之故處明成化十七年巡撫秦紘築以指揮守之嘉靖十八年中丞陳講設守備建倉萬曆十四年發石利民地候極寒不宜五穀唯菽麥大豆生焉魏志云明嘉靖十八年刷神池長城温嶺蕎麥川磨石山之間塹道不通近則蕎麥川口利民堡並爲孔道矣

八角堡城 明治二年兵使王璿築嘉靖四年建八角倉六年巡撫江潮拓之萬曆十五年發明時神池統圪塿壠石湖嶺西溝口諸堡利民統得勝勒馬蔣峪諸堡八角統乾柴溝野諸長林諸堡敵騎皆常至焉

五寨縣城

三關西路圖云係明鎮西衛五所大寨地

通志鎮西衛地

嘉靖十八年總兵周尚文始建堡城

西路圖云屯軍屢被寇患

設堡始免初設守備置倉後改防守增設衛經歷倉使

各一居其中萬曆九年兵使蕭大亨擴其舊制周四里有餘高三丈五尺厚五尺爲東西南三門而甃之書石表曰五砦城大原高自治碑云爲臺十二樓櫓相望隱如金湯至四十八年大雨城壞防守俞昌祚修焉暴謙貞紀以碑至一國朝雍正三年始爲今縣城城如明代所築之舊五寨城守營在焉十二年知縣劉耀珪率民出錢治葺傾圮又名城東門曰捧暉南曰迎薰西曰秩成五寨志畧云城四望南北亘一里東西三里一分城樓八座水環三面利資灌溉南山林木所出民物殷阜饒生計塞上一都會也

三岔堡 五寨縣北六十里亦明嘉靖十八年周尚文築萬曆九年兵備胡來貢甃三岔路當四達今五寨屯驛馬于此

官署

寧武始惟守禦千戶所署耳既而守備副總兵以次設而兵備同知皆在焉又當初時巡撫防秋亦臨其地戶部主事理餉者御史巡行者並有館廨爲蒞治所若乃衛經歷倉使巡檢之屬衙宇非一蓋事多官衆則署舍繁增至於國朝員缺裁汰或朔新改舊以居守土其餘或歸圯廢過者且不知昔之爲何署也夫署者著也著其處以示人使知所瞻畏而聽政乎是者亦當顧其地而思其不易



居今列雍正三年以來刺史縣令之所宅以志官署若其有於昔而今在所廢亦附入焉庶幾前世之遺制餘跡尚得因之以考見云

### 寧武縣

寧武府署在郡城中少東北七百戶街負山臨遼地勢高爽雍正四年知府郎瀚建卽故寧武道署之舊改剏爲之府經歷謝廷恕董其事署成規局宏整門屏東西兩坊翼之坊門高廣太守車騎所出入也循坊列柵以禁行者柵周方寬濶中容吏士數百人大門三楹正南面啓再入爲儀門自儀門入爲大堂堂前有抱廈堂左爲兵餉庫右爲庫軍房堂下東西吏舍各六東南官廳在焉西南則隸卒夜值者居之儀門外東爲土神祠西庫神廟由大堂而後爲宅門門外左右班房各一門內左右各有房三間皆北向其北爲二堂堂東西屋各三間堂下門東西啓自東門入爲書室五間皆南向復有屋三間北與書室對門由西門入書室二間客廳三間客廳南對者爲琴鶴軒亦爲射廳凡

三間射廳之西爲馬廐有井以飲馬有祠屋爲間者四而庫以祀馬祖自二堂後入門爲知府內宅住房三間東西洞房各二廂房各三門外東西偏房各一又東爲厨最後房五間因山爲趾勢獨高見郭外諸峯房東西屋各三間又夾道中屋二間東如之

府經歷司署一在府署外西偏故明兵備中軍署也後復爲所千總署雍正四年經歷謝廷恕改建大堂三間堂東西房各三間大門三間儀門一間住房三間後房三間左右廂房各三間方初設府署時官多無署經歷司寓民舍而寧武令寄于總故解中卽今經歷署也後以明時故同知署爲縣署廷恕始得改爲之

寧武縣署 在城西舊城街人呼所街嘉靖二十六年年初設寧武通判萬曆三十七年改設同知其署則設通判時所建者康熙三十二年改爲太原中路同知署中路廳張大典重修雍正三年中路同知移偏關遂以爲縣署大堂三間堂東西吏舍各

七間堂南儀門五間儀門內大門三間門外照壁  
一東西柵門二大堂後二堂五間堂東爲班房西  
爲庫二堂後三堂三間住房五間其東書房五間  
東西配房各三間其西書房前後各三間又西住  
房六間餘房四間馬廐在大堂東箭道在大堂西  
廐有馬神廟

典史署、在縣署大門內東偏

寧化堡巡檢署、在寧化城南門內

寧武叅將署 在城內平陽營街魏志云本明時巡

撫防秋行署也後爲總兵署國初爲副將署康熙

三十一年移副將于殺虎口其署遂空雍正四年  
利民叅將移駐府城入居鎮署則今叅將之署也  
大堂五間東西架閣房各五間大門三間門內夜  
役房二間正面牌坊一座東西轅門二照壁一二  
門七間軍牢房一間二堂五間住房七間東西廂  
各五間大書房三間內書房三間箭廳五間大箭  
廳三間馬神土地祠各三間東西轅門鼓角樓各  
三間官廳一座旗牌廳三間



寧武府志 卷之三  
中軍守備署在頭百戶街卽明守備舊署大堂三間東西架閣房各三間軍牢房一間大門三間照壁一東西柵坊二大門內東南隅望樓一二門三間內丁房二間大堂之左爲二堂凡三間過廳一間書房四間住房五間東西廂各三東北角樓一旗牌廳一夜役房六間軍器庫三間在火神廟蓋明時寄設于此今如之

公所附

萬壽亭 在城中正北乾隆四年知府魏元樞建爲郡官朝賀祝釐之所元樞有文記之

試士院 在七百戶街叅將署東其地爲明巡按察院故址雍正五年知府郎瀚同知董泗儒知縣江楊瑁邵士楷高人傑與五學生員捐金共建爲提學使者校試之署

萬億倉 在城北鎮朔樓前明萬曆中設以儲軍食有倉數十楹今止存新舊廩二十一間貯穀石外倉神廟三間倉大使署在倉前今已廢

寧化倉 在寧化堡內倉副使久裁署廢以巡檢

司之

義倉二所一在城中一在寧化乾隆十二年知縣錢之青捐設

教場在城東關外演武廳五間明時有兵備使者榜之曰嚴翼堂左右角鼓樓及大纛所樹之臺規制皆壯嘉靖中所築也乾隆九年叅將馬佐邦重修

古廢署

戶部分司署初明永樂間以戶部主事一員來理屯衛糧儲後不常設至嘉靖中復置且令三年一更代隆慶萬間歷官者薛亨李修吉並著清聲舊有分司署在郡城內後廢郡人卽其地爲廟以祀周遇吉

寧武守禦千戶所署明時官署最古者今失所在

偏關縣

駐劄偏關寧武府鹽捕同知署在偏關縣署西北本明西糧廳署與偏寧道署同時建于嘉靖己未歲順治十七年同知錢奇嗣康熙四十七年同知

朱瑾先後重修雍正三年改寧武府同知署同  
偏關縣署一在縣城之中明成化十二年掌印指揮  
李剛建爲所署西有吏目公廨嘉靖及崇禎中增  
飾有加至一國朝而署空雍正三年改縣署焉知  
縣江楊瑁等修

典史署 在縣治之南雍正七年知縣江楊瑁建  
老營巡檢署 在堡內

偏關叅將署 在城西偏明成化二十三年兵備王  
明建嘉靖間總兵董一奎修叅將之設在成化十  
八年而偏關先有副總兵至嘉靖中以副總兵爲  
總兵官駐寧武卽以總兵署爲叅將署乾隆四年  
署叅將楊贊重修

中軍守備署 在縣治西乾隆三年知縣賴廷捷以  
古署之久廢者改建焉

偏關老營堡叅將署一在堡城內西街仍明舊署乾  
隆五年重修

魏志云明正德八年置游擊將軍駐老營嘉靖  
二十年改置分守叅將遂成重地至今因之



中軍守備 仍明舊署乾隆七年修

偏關水泉營游擊署 在堡內東北隅

水泉營千總署 在堡內

草梁山把總署 在本堡中

滑石澗把總署 在本堡中

保德倉 在縣治北舊置廩八十間今共新建廩

止三十餘間貯屯糧并採買穀石

義倉 在道署廢址乾隆十二年知府魏元樞知

縣陸剛同建

社倉 在大倉內雍正五年知縣江楊瑁建

廣積倉 在老營堡明成化十二年侍郎杜銘所

建

馬站倉 在馬站堡內

古廢署

兵備道署 初爲鎮守太監所居明成化十七年

守備戴廣建正德十三年九月武宗西幸榆林

駐蹕其中嘉靖中始改爲按察分司署卽故偏

寧岢嵐二兵道署也康熙六年省兵道署遂虛

三察院署 一在縣治西爲明時三院巡閱行署  
今唯後樓尚存一爲東察院在城東南設以待  
督撫總鎮防秋來駐者一爲後察院明巡按行  
署也在西糧署東今並廢

監收廳 在西糧廳署內之右明成化十三年建  
設官以收稅課者

西盈庫 在同知署左

軍器局 在縣治西

夷館 城內西關各一萬曆中建以居夷人之來  
降及入貢者

接官亭 城南五里成化中戴守備建卽羅漢坪  
地也上並廢

### 神池縣

神池縣署 在城內東新街雍正三年設縣雍正六  
年知縣汪志備建署

典史署 在縣署內西偏

神池都司署 在縣署西中街

縣倉 在縣署西北爲屋二十五舊有大使一人

汰于雍正五年

義倉 在明察院行署廢址文昌祠中知縣李識  
蒙設

神池利民堡都司署 在堡東門內

利民把總署 在堡內

神池八角堡都司署 在堡內東北

利民倉 在堡城內

八角倉 在堡城內

五寨縣

五寨縣署 在城西門內明洪武七年建鎮西衛設  
左右中前後五所爲五寨堡萬曆中廓左所堡城  
而贅之卽今五寨縣城也縣始于雍正三年至六  
年而縣令猶居民舍明年己酉知縣張國正始營  
度官地建立新署頗稱宏敞足爲聽政之所矣  
典史署 在南大街亦張國正建

五寨城守營署 在東大街明時指揮守備衙也

三岔堡把總署 在堡內

廣盈倉 縣南門內明嘉靖間建預備倉在其中



新倉 在城西南乾隆八年知縣劉耀珪所建  
屯豆倉 在三岔堡內東北隅明時建

古廢署

故察院署 在十字街之西明時建年久傾廢雍正  
正丁未歲知縣張國正以其地改建學宮

明鎮西衛經歷署 隆慶中建今失其址

寧武府志卷之四

學校

寧武始未有廟學也明成化二年旣設關守至嘉靖  
七年戊子守備譚鉉告於巡撫江潮請之朝廷乃  
建儒學與諸衛等廟成自九年庚寅聖殿賢廡明  
倫之堂與尊經閣教官署舍規制具備除掌印訓  
導一員司教事十年辛卯提學使者陳某召試諸  
生立等第定貢額於是彬彬多弟子員其後三十  
二年癸丑巡撫王某設餼廩銀三十五年丙辰總

兵韓承慶置書籍其泮池之鑿則丁巳歲總兵張承勲爲之至辛酉壬戌兵備副使殷仁嘉沈紹德總兵佟登相繼修葺且增造銅祭器二百銅爵七十燭檠屏壁之屬先未有者至是悉具歷隆慶萬下及崇丁丑且七十載矣鄒平張毓泰來爲同知覩其傾敝乃復加修而廟貌如故又七年入國朝仍爲寧武所學雍正三年改關爲府知府郎瀚乃請立府學而以明時所學爲寧武縣學又廢明老營堡儒學而以堡學諸生歸府學充郡庠弟子員其建學之費取用公家又撤寧化所明時察院行署之材以給構造一切規制視省學焉

### 寧武府學

在府治西北城之陽繚以周垣外爲大門門外樹以屏壁夾以兩坊自大門入爲泮池池上有橋橋南爲櫺星門凡三間入櫺星門爲戟門入自戟門爲大成殿殿五楹左右爲東西兩廡廡各五楹其戟門傍東西角門各一間名宦祠在戟門左鄉賢祠在戟門右各凡三楹齋宿房在櫺星門內左省

牲所在櫺星門內右各凡三楹明倫堂在大成殿後堂左右齋房各三間崇聖祠三楹在明倫堂東其在崇聖祠南櫺星門之東者爲魁星樓學建於雍正五年三月唯尊經閣未及構云

寧武府儒學教授一人訓導一人署在文廟西偏講堂三間東西門斗班房各一間教授宅門樓一座住房三間東西配房各一間訓導宅如之 此外爲大門

學中所貯書十三經注疏一部通一百二十本爲函十二二十一史一部通五百本爲函五十明史一部通百十二本爲函十二先是經史皆買於布政司而使郡縣學領焉獨寧武府學以無尊經閣與禮部例不相比且不得領時永平魏侯元樞知郡事乃與寧武令施作楫神池令李識蒙五寨令劉耀珪共捐俸銀輸官以當書值遂得領歸郡學與舊所有周易折衷書詩春秋三經傳說若朱子全書康熙字典康濟錄急公自愛書四書講義學政全書等凡十部使學廣文學藏之



寧武縣學

故明寧武所學也在縣治東七百戶街舊規宏麗  
入國朝歲久多圯其明倫堂已無復存雍正三  
年改所學爲縣學至乾隆四年吳人施作楫爲令  
始以千金整之更建明倫堂廣文署於是宮墻重  
新作楫自有記

學凡大成殿五楹 東西廡各九楹 戟門五間  
櫺星門三間 泮池一 大門門樓一座 照壁  
一座 戟門左名宦祠三間 右鄉賢祠三間  
櫺星門左齋宿房三間 右省牲所三間 大成  
殿後明倫堂三間 左右齋房五間 明倫堂後  
尊經閣五間 明倫堂西崇聖祠三間 櫺星門  
東文昌閣一 門西魁星樓一

寧武縣儒學教諭一人署在明倫堂東

明嘉靖四十二年修學有冀南道劉涇碑崇

十年張毓泰修學亦有碑而失作者姓氏魏志  
稱自毓泰後屢加修葺未知修於何時何人則  
絕無碑刻可考若劉涇之碑所謂書籍器物則

散佚於兵火之餘歲年之久而益莫之可問矣  
偏關縣學

明 治元年山西巡撫左鈺上言偏關守禦所近

逼沙漠地大人衆請設學校教育英才使移易風

俗朝議方許之而鈺移鎮陝西繼鈺者巡撫翟瑄

山西都指揮王昇相與經營而兵備王學力任其

事乃斥東城平其崗阜以其地爲廟學舊制大成

殿大成門各五間櫺星門牌樓三間東西廡各二

十四間庫厨六間居仁由義磚門二座明倫堂五

間東西齋房十二間學官公廨二十六間生員講

習三所六十間共百餘楹太原以北廟學之宏鉅

蓋未有也始于元年九月竣於明年十月侍郎張

頤爲碑歷正德嘉隆萬 一 間兵備楊綸守備雍彬

兵道趙彥李從心等皆加修整而泮池則鑿於總

兵祝雄萬 一 辛丑修學時侍郎萬世德有碑入

國朝所學仍舊雍正三年改爲偏關縣學然規制

異於昔矣

大成殿五間 殿前月臺高五尺周二十丈 東

西廡各九間 四周角房十二間 戟門五間  
東西角門各一間 泮池石橋一 櫺星門三間  
大門一間 照壁一 戟門東西名宦鄉賢祠各  
三間 大成殿後明倫堂三間 堂後尊經閣五  
間 堂左右齋房各六間 文廟東崇聖祠三間  
大門一間 廟左文昌閣一 廟中藏祭器鼎五  
尊十爵九籩豆各五十凡一百二十四物皆明時  
所遺者

偏關縣儒學教諭一人 訓導一人 教諭署在文廟後  
訓導署在老營堡

老營堡廟學立于明萬 八年巡撫楊綵請設  
訓導一員 歲科取童子八人入學 都御史成都  
高文薦碑記其事 入 國朝堡學仍舊 雍正三  
年汰併偏關縣學 堡內廟學既不敢撤 則使訓  
導仍居老營堡 主春秋祀事 歲給銀二十八兩  
以供祭 乾隆十年布政使嚴瑞龍裁去之 十一  
年知府魏元樞因諸生有請 分明時兵備 陳昌  
祚所置偏關學田之租 以備禮饗者 慮其不便



且無所濟乃議令邑人共輸爲久長計于是紳士張鵬翹等及老營水泉馬站諸堡生員共輸金二百一十有奇魏守亦出俸助之共得二百四十金謀置田使祀無廢魏刻碑以示久遠焉

神池縣學

學設于雍正三年然尚未有廟至九年知縣事張國正始建文廟學署于縣治之北隅

大成殿五間東西廡各五間戟門三間戟門左右名宦鄉賢祠各三間櫺星門三間泮池一大門一明倫堂三間崇聖祠三間櫺星門東官廳三間門西省牲所三間門左文昌閣一門西魁星樓一神池縣儒學訓導一人署在廟門內西偏

考明時神池就試者皆附寧武所學中

五寨縣學

明鎮西衛學訓導一人司教事以師衛子弟爲生員者然無泮宮殿廡之設而與岢嵐同其廟學焉雍正三年既改衛爲五寨縣遂與岢嵐分學得生員注籍者一百七十餘人而自爲學矣五年知縣

張國正因明時察院署址經理立之

大成殿五間 東西廡各五間 戟門三間 門

左右名宦鄉賢祠各三間 泮池磚橋一 櫺星

門三間 照壁一 明倫堂五間 左右齋房各

五間 官廳三間 省牲所三間 崇聖祠三間

櫺星門東西文昌閣魁星樓各一

五寨縣儒學訓導一人署在廟內西北隅

郡之爲學者五然府學每試童子所錄不過十

五人寧武八人神池五寨初僅六人至乾隆二

年始益二人與寧武學等而偏關每試選爲弟

子員者其名數乃同于府學則非獨以偏關老

營併合爲一不得不因其舊而予額獨多亦其

翹俊之產往往倍于他縣也今五學諸生能文

者偏關稱最蓋自明 治以來相沿於詩書之

習而風氣成焉左鈺之功於是遠矣

書院

鶴鳴書院 在寧武府署西南鳳凰街乾隆十三

年知府魏元樞設延五學生員講業其中

卷之四  
八  
儋林書院 在偏關縣城南街西巷內乾隆八年

知縣陸剛設

關西書院 在偏關縣西關鞏西樓南係明時建  
今廢

管涔書院 在五寨縣城東門內大街文昌祠中  
今爲義學

寧文書院 明正德十年兵備張鳳狃建寧文堡  
卽立書院于中以教軍餘之俊秀者後改建于  
北城之陽火神廟東久廢無址

### 義學

寧武府義學 在府署西七百戶街忠義祠後乾  
隆五年知府魏元樞所設

偏關西府義學 雍正二年同知董泗儒建又老  
營堡義學在文廟內有官地學租以給修脯

社學 在叅將署東明 治初與儒學同時建久  
廢

神池義學 在縣署西北知縣李識蒙設時神池  
湮淤民佔耕爲田李令使耕者歲出租穀石以



助廣文

五寨義學 卽管泮書院之舊

郡邑以學校爲標表，剏造規爲廢興，歲月謹而書之，則凡爲吏者能知所重與否。及其一時人事之盛衰，儒風之優替，皆可得而見。故雖書院社學設在明時，久而變更毀滅，以至於無存，猶著其名而不使盡沒，則予志學校意哉。若夫佾舞之數，釋奠之儀，列姓氏於廡，賢記褒隆於時典，斯亦環海所同。豈惟一郡之故事，載乎令式，則有司存省煩，就約非云畧耳。

學田

寧武學田明萬 丁酉通判陳某置不詳其多

少後兵備龍某者以田易生員賀某地起文昌祠，康熙二十八年中路同知蔡珍念寧武士多貧，無讀書費，始出己資買田六百畝，有奇于三岔屯之南庄山下，歲收其入以賦于學。至今賴之教諭何祖武有學田碑記立學中。

偏關學田明 治間兵備陳昌祚募墾塞下設

給學租一百二十四石水泉堡三十石滑石澗三十石草梁山堡五十八石楊家上下塢六石歸租于學以爲每歲修理學宮之資後漸荒塌且多侵漁今每歲冊報止收租粟七十五石五寨學田五十七垧在城北二里許康熙四十四年太原西路同知卞永康置原地九十垧後爲民張有福佔奪其半今止四十五垧可收租粟十石民丁洪照又捐城濠地十二垧皆菜畦膏壤歲可收租錢十六千今爲義學教讀生員

修脯資

田賦

寧武府屬四縣共各項地一萬六千四百四十三頃  
二十六畝零

寧武縣共各項地四千九百九十九頃十三畝零  
偏關縣共各項地四千七十三頃二十七畝零  
神池縣共各項地四千二百六十九頃四十九畝零  
五寨縣共各項地三千一百四十九畝零

上定墾田數

寧武府屬四縣共徵本色豆穀二萬二千五百八十



四石四斗零折色銀三千八百九十九兩六錢

寧武縣共徵本色豆四千三百六石四斗三升一合

八勺零

每年忻州額徵米一千四百九十七石四斗零

豆二十四石八斗零定襄縣四百六十五石九

斗零靜樂縣米六百二十五石三斗零解寧武

萬億倉三處除留支本地兵外起解之數多少

不一

寧武縣徵折色銀二千三百七十兩三錢四分零

偏關縣共徵本色豆穀四千八百六十九石六斗七

升零

舊係嵐縣額征米七百一石六斗解偏關保德

倉乾隆四年起豁免米十二石二斗零每年布

政司庫發銀六百二十六兩五錢二分三厘定

價九錢一石由偏關縣買米六百八十九石四

斗六升六合零支給偏關兵食其嵐縣之米歸

本縣常平倉

偏關縣徵折色銀九百二十四兩一錢二分零

神池縣共徵本色豆七千六百二十七石三斗六升  
九合零

神池縣共徵折色銀四百七十九兩六分二厘零

五寨縣共徵本色豆五千七百八十石九斗八升八  
合零

五寨縣徵折色銀一百一十六兩六分四厘零

上正貢賦額

寧武府屬四縣共徵均徭銀四千二百三十七兩二  
錢零

寧武縣各則不等行差人二千三百二十七丁均徭  
銀一千四十八兩四錢七分零

偏關縣各則不等行差人五千七百丁均徭銀一千  
九十兩七錢零

神池縣各則不等行差人四千四十丁均徭銀一千  
二兩五錢零

五寨縣各則不等行差人四千九百一十四丁均徭  
銀一千九十五兩零

上丁銀

寧武府屬四縣共起運留支銀八千二百七兩九錢三分零

寧武縣起運銀一千三百六十六兩五錢九分零  
留支銀二千五十二兩二錢二分零

偏關縣起運銀四百四十二兩一錢一分零

留支銀一千五百九十五兩一錢九分零

神池縣起運銀三百五十一兩四錢八分零

留支銀一千一百二十九兩七錢八分零

五寨縣起運銀一百七十三兩二錢五分零

留支銀一千九十七兩二錢八分零

上支運成數

寧武府屬四縣乾隆十年分至十四年審定戶口共  
土著民二萬二千五百七十戶男女共十二萬六  
千四百十六口大口六萬五千六百三十九小口  
六萬七百七十七

寧武縣土著民六千一十戶男女大口一萬四千四  
十三小口八千六百一十六 常平倉貯穀二萬  
三千一百八十三石八斗零社倉貯穀一千二百



三十九石六斗零

偏關縣土著民五千一百四十五戶男女大口一萬六千七百五十一小口六千五百八十七 常平倉貯穀二萬九千四百三十四石社倉貯穀一千六百九石九斗

神池縣土著民六千三百五十戶男女大口一萬八千七百六十四小口二萬二千四百三十八 常平倉貯穀二萬一千三百五十二石一斗社倉貯穀麥六百二十四石六斗

五寨縣土著民五千六十戶男女大口一萬六千八十一小口二萬三千一百三十六 常平倉貯穀二萬三千九百九十六石九斗零社倉貯穀一千一百一十九石

四縣共貯常平社倉米豆穀合得十萬一千八百三十石二斗零

上戶口

本府經收商稅正額銀九十九兩五錢四分六厘盈餘銀約六百五十一兩零

經收騾馬畜稅上額銀三兩九厘盈餘銀約四十八兩零

經收寧武神池二縣各牙帖九十張共收牙稅銀七十一兩四錢

凡正餘牙稅銀共約八百七十二兩九錢五分五厘零

本府鹽捕同知經收商稅正額銀四十三兩一錢二分二厘 盈餘約三百五十兩零

經收騾馬畜稅正額銀五兩六錢四分九厘 盈餘銀約四十兩零

經收偏關五寨二縣各牙帖四十五張共收牙稅銀三十四兩六錢

凡正餘牙稅共約四百八十兩零

寧武縣經收房田商畜當雜諸稅通約銀六百七十兩零

偏關縣經收房田商畜當雜諸稅通約銀二百九十兩零

神池縣經收房田商畜當雜諸稅通約銀三百三十四兩零

五寨縣經收房田商畜當雜諸稅通約銀二百四十

二兩零

凡一府一廳四縣每年約共經收諸項稅銀二千八百九十九兩五錢六分零盈縮不等盡解布政司

上征稅

明洪武三年山西行省請令商人于大同倉入米一石太原倉入米一石三斗准給淮鹽一小引商人鬻畢卽以原給引自赴所在官司繳之召商輸糧而予之鹽謂之開中鹽法邊計相輔而行邊方米穀無甚貴踊至成 間戶部尚書葉琪請召商納

銀運司分給各邊而開中之法廢嘉靖十九年以後戶部題准每年三關該存積鹽二十五萬九千二百一十五引二百三十五斤二兩凡兩淮鹽十四萬九千三百七十六引每引價銀五錢搭配長蘆鹽三萬六千一百五十五引每引價一錢五分浙鹽七萬三千六百八十引每引價二錢五分俱召商輸粟以備邊儲偏關志云本所明時餉司攤派淮浙東三色鹽引令各商遵奉引內銀數備本



照時估買米豆上倉取實收赴戶部領勘合赴鹽院領票前往淮浙東賣票內關買貨旋關獲利數倍不煩轉輸而邊儲已裕不耽辛勞而南貨已至公私便之

國朝寧武府同知與寧武神池二縣每年共銷鹽引三百九十張每引銷鹽二百斤共銷鹽七萬八千斤共額徵鹽稅銀一百五十五兩五分零外解紙價銀一兩一錢七分鹽捕同知每年赴運城鹽法道衙門總領三百九十張引寧武縣則又向同知衙門分領引一百四十張神池縣分領引八十張銷鹽既盡則以原引赴銷於鹽院其鹽稅紙價解交河東鹽運司

魏志云府鹽捕同知舊係太原府西糧廳原管偏關老營及鎮西衛所衛所之民近於蒙古俱食蒙古白鹽後雖改設偏關五寨二縣其二縣之引仍依舊例屬同知總銷其寧武神池二縣處鹽務舊係中路同知之所管理居民俱食山陰黃鹽雍正三年改縣之後鹽稅歸於寧武神

池兩縣分管後神池縣詳明改食蒙古白鹽惟  
寧武仍食山陰黃鹽又偏關舊例鹽稅出諸四  
營十七堡營丁頗爲患苦其後縣人食蒙古之  
鹽乃稅其賣鹽者而營兵始免於累

明初仍宋世中鹽之法以鹽引輸邊故淮浙山  
東皆輸及山西神池諸堡若解州鹽池所產不  
過行於陝西河南與山西平陽潞安二府澤遼  
沁三州而已其時塞下之民所食皆官鹽而無  
價昂稅重之困自開中法變久而愈弊今太原  
寧武領河東之引而不食其鹽唯輸錢於官謂  
之鹽稅所食者多本處土鹽味尤苦惡乾隆十  
一年當事者欲增餘引知府魏元樞議稱寧武  
地處極邊民貧土瘠食鹽之戶無多今若增餘  
引不但引有壅滯勢必派累小民唯免其加增  
於事爲便後竟不復加

上鹽法

24890



